

O LE SULU SAMOA



EKALE SIA FAAPOTOPOTOGA KERISIANO SAMOA
OLE NUSIPEPA FAA-LE-LOTU NA FAAVAEINA I LE T.A. 1839



FAAAVEINA 1839 O LE SULU SAMOA FEPUARI 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

FAAAVE LE EFKS NUU FOU SISIFO.



Susuga Luapene Nepo FS, Hon. Papali'i Ta'eu Masipau, Elieta & Lauama Fonotaga FS, Fili Si'a FT, Susuga Esera A. Esera FS, Dr. Taipisia FS & Vaisola Leilua, & Sui o le Aulotu, EFKS NUU FOU SISIFO (Eklesia Faamisionare, Matagaluega MALUA).



Sui o le Aulotu Faamisionare fou, EFKS NUU FOU SISIFO.

O LE FAASINO UPU

- i. O LE LAUGA...2
- ii. OSIGA FEAGAIGA EFKS TOAMUA.....4
- iii. FAAVAEINA EFKS NUU FOU SISIFO...5
- iv. KONELIO...6
- v. OLA FAATASI MA TAGATA ROMA...7
- vi. AMIOTONU A LE ATUA...7
- vii. O LE PEROFETA MULIMULI....8
- viii. O LAU AFIOGA O LE SULU I VAE...12
- ix. TALA PUPU'U MO TAMAITI...15
- x. ATA O MATAUPU LOMIA..16

O LE LAUGA

Tusi Faitau: Luka 2 : 1 – 7

Matua: Luka 2 f.1, “*O aso lava ia na oo mai ai le poloaiga a Kaisara Aokuso ia tusia uma ai le lalolagi*”

Manatu Autu: **O ē na pule** (The powers that be)
Manatu Autu o le Vaiaso: **I taimi o Iesu** (At the time of Jesus)

A tu’ufa’atasi le manatu autu o le vaiaso, ma le manatu autū o lenei aso, ona aumaia lea o se manatu e autū i ai mafaufauga fa’aleagaga ma se feau o le

Talalelei: **“O ē NAPULE I TAIMI O IESU”**

A talanoa loa i le pule, ua tatou talanoa i le tagata ua i ai i se tulaga maualuga, tulaga taualoa ma amanaiaina e tagata o se sosaiete - pule o le galuega ofisa, pule i le kamupani ma fa’apotopotoga, pule foi i le malo ma le atunu’u. O se tagata ua tu’u i ai le fa’atuatuaga o nisi, o le tagata e fa’alagolago ma fa’amoemoe i ai tagata i lana taitaiga. O le pule, o le tagata ua i ai i lona malosi fa’apule, ma lona tulaga fa’ata’ita’i se malosiaga e sili atu nai lo isi lava – le malosiaga na te faia ai fa’atonuga ma fa’ai’uga.

E lē mafai lē mafai lava, pe fa’afaigata foi ona fesiligia e nisi lana fa’ai’uga fai ma ana tonu, auā o ia ua i ai le pule. Peitai o le pule foi, o ia lava e toatasi e tu’ua’i ma pa’ū i ai le lelei ma le leaga. O ia e inuina le suamalie o mealelei uma, o ia foi e tofoina le ‘o’ona pe a o’o ina tulai mai ni fa’aletonu. O le mea lea e tāua ai le lelei o le pule, ia tausa’afia ma amiolelei, mataala i taimi uma, ia poto ma atamai, ia malosi ma maloloina le tino, lona mafaufau ma le agaga – a e o le sili o na mea uma, ia fa’amaoni ma alofa. Ia

lagonaina le loto alofa, ia iloa ona loto fesoasoani i so’o se tasi e sulufai atu i ai, a e ‘aua le pule ma le sauā.

I le Tusi faitau o lenei aso, o le tala i le vaitau po o le vaitaimi na soifua mai ai Iesu Keriso i le lalolagi, a o pulea e Roma le nu’u ma tagata o Iutaia. O le taimi lea o Kaisara Aokuso, ua fa’amauina o le uluai Emeperoa lea o Roma, na ia pule ai mo le luasefulu ma ona tupu tausaga. O Kaisara Aokuso na fanau i Roma, a e na fai ma atalii fai (adopted son) o Julio Kaisara. O se tagata e malualii ma maualuga, e atamai, o le ala lea na faae’e i ai le igoa o Aokuso e le senatoa o Roma - auā o le uiga o le igoa Aokuso “o fa’aloaloga, poo le faa-alofa”. O le tagata ua ave i ai fa’aloaloga ma alofagia e tagata ona o lona atamai ma lona poto, aemaise lona tulaga maualuga. E leai lava se eseesege o Kaisara Aokuso ma se sa’o i totonu o tatou nuu ma aiga. E ave i ai fa’aloaloga, e fa’alogo ma usitai i ai tagata uma, po o le a lana malelega, e lolo uma manatu ma lagona o le au tautua.

O le poto ma le atamai lea o Kaisara Aokuso na ia taitai ma pulea ai Roma. I faigamalo tetele ma ona faiga-faavae lelei i na vaitau, e manaomia lava ona tausia lelei o a latou fa’amaumau. O le mafuaaga lea na faia ai le tusiga igoa, ina ia tusia ma fa’amaumau uma igoa o tagata taitoatasai ma o latou tupuaga ma o latou gafa.

Lea la e atagia i le tusi na faitauina, ma le fuaiupu ua fai ma matua le fa’atonuga a Kaisara Aokuso. “*O aso lava ia na o’o mai ai le poloaiga a Kaisara Aokuso, ia tusia uma le lalolagi.*” O le upu “poloaiga” ua le gata na o se fa’atonuga, a e o se fa’atonuga ua faia fa’amalosi. O lona uiga, o le fa’atonuga ua uma ona fa’atulafonoina – a e a fa’atulafonoina loa se mataupu, ua tatau ona usitaia e tagata uma. E leai lava se isi e tu ma tete’e, pe faia i ai sona loto malosi, e fa’ali ai sona atamai ma se iloa.

O le tulafono lava ia, o le tulafono – o le mea foi lea e mafua ai ona molia nisi ma ua fa’apea mai, ua lē usitaia le tulafono ma le fa’amasinoga. O le poloaiga la lenei a Kaisara Aokuso, o le poloaiga ua fa’atulafonoina. Ua uma ona ioeina, ma ua pasia e i latou e maualuluga i le sosaiete, o i latou ua i ai le pule, e pulea ai malo ma atunu. Fai mai le poloaiga po o le tulafono – “*ia tusia uma le lalolagi*”. O le tusia uma o le lalolagi, o le faailoga lea o le malosi o pulega a Roma. Ae malie foi le mafuaaga e manaomia ai ona tusia le lalolagi, ua le gata mo le fa’amaumauina

o igoa, gafa ma tupuaga o tagata, a e o loo lafi mai ai tua lona mafuaaga autu, o le lafoga totogi. O le lafoga e totogi e tagata uma, agai i le malo o Roma. O le lafoga fai mai e fa'aleleia ai le malumalu, peitai e itiiti i le malumalu, a e tele i isi galuega, faapea i latou e tulaga maualuluga i le malo. E tāua le lafoga e aoina, peitai o le auala ua faatino ai, o se auala sauā ma le fa'asiliaupule o taitai. Ma e foliga mai ua lē o gatusa le uiga o le igoa o Kaisara Aokuso, ma lana fa'atinoga, ua lē tutusa ma lana pule, ua lē tutusa ma lana taitaiga.

O le faitauga o lenei aso, o loo amata lava i se ata malosi ma le mamalu – o Kaisara Aokuso ma le pulega a le malo o Roma. Peitai o le aliali ane, ma le fa'afuasei lava ona taula'i o le tala i se ulugalii fa'atauvaa ma le lē taualoa o Iosefa ma Maria, o se feau tāua lea mo le au faitau. Aemaise ai lava le ta'ua ai o loo ma'itaga le tina o Maria ia Iesu, le Pule Silisili Ese o le lagi ma le lalolagi. Le Pule Silisili ese, le taitai loto alofa ma loto fa'aaloalo - fai mai na fanau mai i se ala maualalo, lē taualoa ma lē amanaiaina.

O le tu'ufafeagai lea o le taitai ma le pule a Kaisara Aokuso, ma le pule a Iesu o le a fanau mai. O le pule ma le taitaiga a Kaisara Aokuso e mulimuli i le tulafono e a'afia ai tagata. E fai ana poloaiga i luga o le tulafono ua fau e tagata maualuluga ma ua i ai le pule. O le poloaiga e fa'amalosia tagata uma, a e o le poloaiga e fa'avaivaia ai le tagata vaivai, e fa'amativaina ai le tagata ua mativa, a e atili malosi, mauoa ma tamaoaiga ai le tagata, o loo ua malosi ma tele ana oa.

Peitai o Iesu, o lana pule ma lana taitaiga, e fa'alagolago ma fa'amoemoe i le Agaga Paia. E faamoemoe ma faalagolago i le Atua lona Tama, o ia o le Pule Aoao o poloaiga ma tulafono uma. E lē fa'amalosia, a e tu'u i le filifiliqa saoloto a le tagata, o ia lava na te faia le faaiuga tonu ma le fa'amaoni. E sa'oloto ai le tagata puapuagatia, e malosi ai le tagata ua vaivai, e amanaiaina ai le tagata ua tu'ulafoaina. O matai po'o Emeperoa, o ni tagata o nuu ese, o le mea foi lea latou te lē fa'atauaina ma lē amanaiaina ai tusitusiga paia a Iutaia. O le taupulega ma le pulega malosi a Roma i na ona po, ua fa'ataunuina ai e le

Atua le valoaga e uiga i le Mesia – o le tamameamea o le a fanau mai o ia Peteleema. E pulega ma taitai e Kaisara Aokuso ma le malo o Roma le malosi faale-lalolagi anamua, a e o loo sili atu le mana o le Atua ua fa'aalia i mea tetele ma mea fa'atauvaa. O le mana foi lea e mafai ai ona tatou taitaiina ma

puleaina mea uma, pe afai tatou te fa'amoemoe ma fa'alagolago i ai.

O le fa'amanatu taua foi lea mo tatou uma. “*O le pule ma le sauā, e tigaina ai le nuu, a e a pule ma le alofa e manuia le nuu.*” Ua tatou iloa ma masani uma i le eseesege, ma uiga o pulega ma taitaiga lelei faapea foi ma pulega ma taitaiga faaletonu ma lē lelei. O lea ua fa'amalosi mai le Talalelei, ia pule ma taitai ma le alofa, pule ma taitai ma le tonu, faia mea uma i le faamaoni, ona manuia lea o tatou aiga, le nuu ma le atunuu, aemaise le ekalesia a Keriso.

Ua le nā ma le laina, tulou lava le gagana, le taitaiina ma le puleaina o nisi o nuu ma alalafaga i Samoa. Le pule malosi ma le taitaiga ua leai se tapassā, le pule soona fai, a e ua afaina ai nisi o aiga. Totonu o le malo, le gasegase o loo ua alia'e mai i le malo ma lana Palestene. Ua su'e le pule, ua pule foi i le malosi, a e afaina ai tagatanu'u o Samoa.

A e a totonu o le ekalesia? O le ata lafoia lea o taitai ma pulega ua i ai i nei ona aso.

Pau lava o lea, e a le uga e tausili, a e tigaina ai le atigi – e a taitai e saili le pule ma tulaga maualuga, a e fetosoaina ai tagata o loo fa'alagolago atu i ai. Totonu o tatou aiga, taitai ma le pule a matua, le gagana ua fa'amanu'alia ma afaina ai lagona o fanau, peitai o fanau foi ua fiapule ma fia taitai – e taua le usitai ma faalogo i le pule ma le taitaiga a matua.

Lea ua faamanatu mai le Talalelei – tatou fa'ataitai i le pule ma le taitai sili, o Iesu Keriso lea. Fa'aaogaina e Roma lo latou malosi e saili ai le tamaoaiga mai le lalolagi, a e saunia e le Atua le fa'aolataga mo tagata uma, mai lea malosi ma le pule sauā.

O Iesu Keriso le Mesia ua leva ona fa'atalitali ai tagata uma o le lalolagi, lea ua afio mai i se ala maualalo tele. A pule ma taitai ma le alofa, e manuia aiga, nuu, atunuu ma le ekalesia. A pule ma taitai i le sauā ma le soona fai, e malepe ma taapeape. O le pule sauā lea a Roma na iu ai Iesu i le satauro mataga, a e o le auala lea o le fa'asaolotoina o tatou uma, mai le pule sauā ma le taitaiga sesē a le fili ma ana 'au. Na maliu, a e na toetu manumalo mai le oti ma le tuugamau, o le tatou manumalo fa'atasi foi lea ma Ia, mai le pule sauā a le agasala.

Ia tumau i le Atua lona lava viiga, nei seia oo i le faavavau, faavavau lava. Amene.

Saunia: Susuga Silipa Silipa FS,
EFKS Fusi Safotulafai,
FAASALELEAGA

OSIGA FEAGAIGA EFKS TOAMUA

O le toe aso o le masina nei, Aso Faraile 28 na osia ai le feagaiga a le EFKS Toamua ma lo latou faifeau fou, susuga Faalefu Tumutalie FS ma le faletua ia Bellarose Tumutalie. O le Toeaina o le Pulega Paleata Sisifo, susuga Tautua Aurelio FT na ta'ita'i le sauniga, sa faatumulia i le paia o le Ekalesia ma le mamalu o aiga na lua. Na fai ma sui o le Ekalesia i Toamua, le sa avea ma Tiakono Toeaina, Ulu Kini TK, e molimau i la latou filifiliga, e ala i le palota. O le susuga Tale Ah Kuoi AM na tausia le galuega mai ia Setema 2023 seia oo mai nei. Na latou folafola foi o le a latou tausi i le feagaiga, ma tausi faamaoni i le auauna ua totofi mai e le Atua.

Na saunoa tali fuaitau foi le susuga Faalefu e tusa ma lo la'ua taliaina o le valaaau atu a le Ekalesia i Toamua. Sa muamua ona faaleo lo la'ua loto faafetai i le Atua ona o Lana tofiga, e fa'aaoga ai lo la'ua faatauvaa mo Lana galuega paia. Na faafetaia foi le Ekalesia i lana faatofalaiga ua afe ane ai lo latou finagalo ia te i la'ua. Na faafetaia foi le tapuaiga a matua ma aiga, aemaise nai a la'ua aulotu mo le lagolago ma fesoasoani ia i la'ua.

O Tatalo o le sauniga na faaleoina e le susuga Siaosi Mataia FS (Vailoa - tai), o le Tusi Paia na fai tauina e le susuga Tiafaaofo Gatoloai FS (Tulaele) a o le Lauga na sauniga e le susuga Muao Fagasua FS (Vaitele-uta). Na faavae le Upu folafola i le Manatu Autu o le Tusi Faitau Aso - **Ia mata'u i le Atua, fa'aaloalogia le pule.** O se feau ua talafeagai lelei ma le faamoemoe o le aso, ina ia faia mea uma ma le mata'u i le Atua, e afua ai ona faia i le alofa, amiontu ma faamaoni, mo le viiga o Lona suafa e faavavau.

Na saunoa faaopoopo le ta'ita'i o le sauniga e saga faalaei'au le faafeagaiga ma lona faletua, faapea foi le Aulotu i Toamua, i la latou galuega faifaatasi mo le faaolaina o agaga, faaopoopo le lafu mamoe, ma ola manuia tagata uma i le tino ma le agaga.

O i latou na valaaulia e fai ma sui o le Aulotu ma le Pulega Paleata Sisifo, le Matagaluega Paleata ma le Ekalesia Aoao, ina ia faafeiloa'i ma faamanuia le faafeagaiga ma le faletua, e aofia ai le Laulau o le Fono Tele, Laulau a le Komiti Au Toeaina, Tama Penisione, Tausi Matagaluega & Tiakono Katoliko i Toamua, ma Matua faaleagaga o le faifeau ma le faletua. Ona taualuga lea o le sauniga i le Sakarameta o le Talisuaga Paia a le Alii na ta'ita'iina e le faafeagaiga ia Faalefu. O le mae'a ai o le sauniga na afe ane ai i le maota o le galuega, ma silatoga ai le

mamalu o le faapotopotoga, i le le o le Feagaiga na sauniga e le Ekalesia/afioaga o Toamua, i le afio o Ale ma Ulu & Oulua Aiga, Gafaoatoe & Itulua o Satunumafono & Vaaulu na Falelima i ai Faleata. Ona alo lea i tausamiga ma fa'aaloalogia masani, na tapena lelei e le Aulotu ma le afioaga o Toamua. Na taape le faapotopotoga ma le loto faafetai, a o feiloai le Ekalesia i Toamua, ma le paia o aiga na lua o la latou faafeagaiga ma lona faletua, i nisi vala o le osiga feagaiga ua masani ai le tu ma le aganuu mamalu.

O le susuga Faalefu na i'u mai Malua i le tausaga 2018, ona galue lea i le Matagaluega A'oa'oga Kerisiano, o le Ofisa o Paleata se'ia oo ina valaauna nei mo le galuega tausi nuu. O i laua o ni sui o le Aulotu EFKS Vaitele uta, a o ni lupe faalele a aiga ma afioaga, tainane o matua faaleagaga ma Aulotu i Aopo, Saanapu, Faalefa. Ua malu nei le faafeagaiga ma le aiga, i le maota fou na fausia e le aulotu, na faapaia i le faai'uga o le tausaga talu ai. O lea maota fou o le faifeau na fausia e le konekarate a Taito Lealiifano i le tau tusa ma le \$700,000; na toe faafou ma faaleleia foi isi maota o le galuega i le \$100,000. O galuega tetele nei na fai ma mafuaaga o le faatuatuai ona sailia se faifeau na te tausia le galuega.

Ua pale mai le susuga Faalefu ma Bellarose, e soso'o le galuega i Toamua, ina ua penisione le susuga Dr. Eletise Suluvale FS & Rosa i le 2023 - na valaauna e Toamua i la'ua a o avea ma faia'oga i Malua, ina ua uma ona tatala le feagaiga a le aulotu ma le susuga Meaalofa Talosaga Peteru FS ma le faletua ia Vaovai. A o tua atu, na galulue ai se tasi o Ta'ita'i iloga o le EFKS, le susuga Mila Sapolu FT & Faailoa. O ia le ulua'i Pule Samoa o le Kolisi Faafafeau Malua i le 1967. A o galulue i Toamua, sa avea ma Taitaifono o le Fono Tele, a e na fai foi ma Sui Taitaifono, Failautusi ma Teutupe i le Fono Ekalesia Soofaatasi. E pei ona silafia, o le EFKS Toamua o le tupito lea i le itu i sisifo o le Pulega Paleata Sisifo, tuaoi ma le EFKS Paleula o le Pulega Malua Sasa'e. O le Pulega Paleata Sisifo o i ai le susuga i le Toeaina ia Tautua Aurelio FT, ua sauni nei e malolo penisione, ina ua aulia tausaga e agavaa ai, ma ua maliu lona faletua ia Naomi. Pe a aulia le Fono Tele ia Me, ona faamaonia lea o lea tulaga, faatasi ma le filifilia o le susuga Iosefa Afutiti FS e sui tulaga ia te ia. Ia faamanuia tele le Atua i nei tofiga, o le Aulotu, le Pulega, le Matagaluega Paleata, aemaise le faifeau ia Faalefu ma le faletua ia Bellarose. **F. Tolua**

FAAAEINA LE EFKS NUU FOU SISIFO, FALEULA.

“O a’u nei le Ala, le Upu Moni ma le Ola”

O le Manatu Autu lea o le Aso Sa, 2 Mati 2025, na faatuina ai le Aulotu Faamisionare fou ua faasuafaina o le **EFKS NUU FOU SISIFO**, i le afioaga o Nuu, o uta o Faleula. (E ese mai le isi Aulotu **EFKS Nuu-fou**, o le Pulega Faleata Sisifo, Mtg FALEATA). O le i’ugafono lea a le Komiti Faamisionare na faamaonia e le Fono Tele, ua faavaeina ai lenei aulotu fou, o le a faaopoopo atu i le Matagaluega Malua, i le vaaiga a le susuga Toeaina Faatonu ia Fili Si’ a Matalavea FT ma le Pulega Malua Sasa’ e. A o le faatautaiga ma le tausiga o le galuega i le taimi nei, o le a i ai lea i le vaaiga a le Susuga Failautusi Aoao, Dr. Taipisia Leilua FS ma le Ofisa Faamisionare. O le sauniga e faavae ma faapaia ai le Ekalesia fou, na ta’ita’iina e le afioga Sui Taitaifono Fono Tele, susuga Esera Auatama Esera FS. O ia foi na taitaiina Talosaga molia, aemaise le vaega faapitoa, o folafolaga ma ta’utinoga a tagata lotu, e tusa ma lenei faamoemoe. O le afioga i le Tiakono ia Papalii Tapeni Ta’eu, na saunoa i se tala ototo o le amataga mai o lenei faamoemoe. O lona fanua ma lona maota o loo ua faamautu nei i ai le lotu, ua fausia ai le maota le tumau mo tapuaiga i Aso Sa.

O le faitauina o le Tusi Paia ma le Lauga na saunia e le Failautusi Aoao EFKS, susuga Dr. Taipisia Leilua FS. Na faaopoopo foi le ta’ita’i o le sauniga, i le saga faala’ei’auina o le au faatuatua i Nuu Fou Sisifo, tainane le faapotopotoga i lea sauniga. Na auai le afioga i le Fofoga Fetalai o le Palemene a Samoa, susuga Hon. Papalii Ta’eu Masepa’u, susuga Fili Si’ a Matalavea FT, susuga Luapene Nepo FS (Failautusi Matagaluega Malua), susuga Lauama Fonotaga FS & Faletua ia Elieta (Faifeau Penisione), ma le aufaigaluega o Faifeau, A’oa’o ma Faletua o le Ofisa Faamisionare.

O le Failautusi Aoao na tauaaoina le meaalofa a le Ekalesia Aoao e \$5,000, faaopoopo i ai meaalofa a le Sui Taitaifono Fono Tele, le Failautusi Aoao ma le mamalu o le faapotopotoga, na maua ai le tuufaatasiga e silia ma le \$8,000. Ua tuuina atu nei le vaaiga o le aulotu ia Dr. Leilua FS, o tiute e aofia ai le filifilia o se komiti a le aulotu, ma le saunia o se Tusitupe e faamaopoopo i ai a latou taulaga lafo. Na ia saunoa manino i lea aso, o le a faia foi Aoga Aso Sa & Autalavou, Aoga Faifeau, Au Saili ma Asiasiga i aiga. Ua i ai foi tu’utu’uga e tuusaunoa ai le Aulotu mai galuega, fuafuaga ma mataupu masani

faaPulega ma faaMatagaluega, se’ia aulia ona aso e osi feagaiga ai ma so latou faiseau filifilia. A ua tuu le faamamafa i le soifua tapuai, le faamaopoopo ma le atina’eiina o le soifua faaleagaga o le fanau a le Atua.

E tusa ai ma le Lipoti a le Ofisa Faamisionare i le Faatuina/Uluai Sauniga o lenei Aulotu, o loo faamauina ai suafa o i latou o loo ua auai i lenei Ekalesia fou; o nisi o le aufaigaluega, o tamalii ma faleupolu o loo alaala i o latou fanua umia saoloto, i lea vaega o le atunu, ma sa auai i le uluai sauniga:

- (i) Lauama Fonotaga & faletua (Faifeau Penisione)
- (ii) Papalii Tapeni & faletua & fanau
- (iii) Lio Faataumalama & faletua & fanau
- (iv) Elikapo Atoa
- (v) Lio Kevin Nunuafolau & faletua & fanau
- (vi) Peseta & Faletua
- (vii) Venus & fanau
- (viii) Atalii o Ieremia
- (ix) Lio Eneliko & faletua & fanau
- (x) Faavae Lepule

O le tasi lea galuega faamisionare o loo nafa ma le Ofisa Faamisionare - o le sailia, feiloai ma faatalatalanoa o nisi aiga o loo aumau ma nonofo ai i lea itu, e faaopoopo atu i le Aulotu fou ua faatuina.

O loo ta’ua foi i lea Tala o le Galuega Faamisionare i Nuu Fou e faapea: ***Fanua: O le faaiuga a le Komiti o Galuega Faa-Misionare a le Ekalesia, o loo ua sailia e le Ekalesia se fanua e fausia ai le falelotu mo le Aulotu i Nuu i se taimi vave talafeagai.***

Falelotu: E tusa ai ma le faagasologa o galuega a le Komiti ua ioeina ai le fausia e le Ekalesia Aoao le falelotu mo le Aulotu i Nuu i le mae’ a ai o feutanaiga mo se fanua e faase’ e i ai le Aulotu e faatino ai a latou sauniga lotu i Aso Sa taitasi seia oo ina filifili so latou faifeau. O loo ua taoto mai foi i le Ekalesia le finagalo o Papalii Tapeni mo le faatauina o le fanua o loo ua fa’aaogaina nei mo le Aulotu atoa ma fale ua maea fausia ai i luga.

O le lona lua ai lenei o Aulotu Faamisionare ua faavaeina i lenei vaitau, i le galuega a le Ofisa ma le Komiti Faamisionare a le Ekalesia. O le masina o Oketopa 2024 na faatuina ai le EFKS Tiapapata, ua faaopoopo atu i le Pulega Apia Saute, o le Matagaluega a APIA. Ia manuia tele le galuega a le EFKS Nuu Fou Sisifo, mo le viiga o le Atua.

Faatonu Sulu

O KONELIO le TA'ITA'I o le TO'A SELAU

I le Tusi a le EFKS, **'OLE TALAI TAGATA MA LE UIGA O MEA ESEESE UA I LE TUSI PALA'** (Ua Toe Faaopoopoina e MISI KENESELI), o loo faamatalaina ai le uiga o le igoa **KONELIO** (itulau 134):

O le alii Roma sa pule i le 'au e toaselau. Sa nofo i Kaisareia e leoleo ai le nuu o Iuta ua toilalo. Na ia maua le afioga a le Atua, ua ia talia. Ua tuu tupua a ua ifo i le Atua moni. Ua amio atua o ia, i le ua avatu mea alofa i tagata matitiva. Ua lē na o ia, a o lona aiga ua mulimuli ia te ia i le ala lelei. Ua na o le lotu a Iuta ua na maua, a ua lē iloa Iesu. O le mea lea na auina mai ai le agelu ia te ia a o fai lana tatalo; ua fai atu ia te ia, na te amia Peteru e faasino ia te ia le finagalo o le Atua. Ona alu ai lea o lana feau ia Peteru i Iopa. Ua sau Peteru, ua potopoto ai tagata e toatele e faatalitali ia Peteru. Ua fai le lauga, ona to mai lea o le Agaga Paia ia te i latou. Ona papatisoina ai lea o i latou. Galu.x.

A o se isi talatuu faaitalia e faasino ia Konelio, o loo faamatalaina ai e faapea, e le'i pine ona liliu Konelio e avea ma kerisiano, a e faamavae loa mai lona tofiga faata'ita'i au i le vaega'au tau a Roma, a e mulimuli atu ia Peteru i le talaiga o le Tala Lelei ia Iesu Keriso. Ina ua latou ulufale i Efeso, faatasi ma Peteru ma Timoteo, na logoina i latou, o loo i ai se malumalu o atua faapaupau e ta'uta'ua i le aai o Sikepusisi (Skepsis). Na alu toatas i na o Konelio i le aai; na iloa e le ta'ita'i o le aai o Perenise Temetirusi, o se a'oa'o filosofia ma sa ita i le faakerisiano, ona ia aami lea ia Konelio ua na a'oa'i ma otegia i totolu o lona maota. Na tali atu Konelio, na sau o ia e faasaoloto le perenise ma lona aai mai le pogisa o le faapaupau.

Na ita tele le perenise i lenei upu a Konelio, a o fa'aauau pea ona tautala atu le sooo o Iesu, e uiga ia Keriso le Malamalama o le Lalolagi. Sa le'i talia e le perenise le talaiga a Konelio, sa le'i mana'o e avea ma kerisiano, ma sa ia faatonu foi Konelio na te faia se taulaga i lona atua faapaupau i le malumalu. Na ave Konelio i le malumalu o Seu, a e na taunu loa i totolu, ona ia faasaga lea i le itu i sasa'e ma tatalo i le Atua. I lena lava taimi, na lūlūina ai se mafui'e malosi i totolu o le aai, ma sa soloia i lalo le malumalu ma toulu solo le malepelepe i autafa o Konelio, o se vaaiga sa matuā fefefe tele ai le perenise ma ona

tagatanuu. Na faatonu e le perenise ia saisai Konelio ma tuu i le falepuipui i le po. O lena lava po na logoina ai le perenise, o lana avā ma lona atalii sa tanumia ma ua maliliu i le solo ifo o le malumalu. A o tagi lotulotu ma auē faanoanoa le perenise, na oo ane se tasi o faifeau a Seu, e igoa ia Parapate, ma fai ane i le perenise, na ia lagona manino atu leo o lana avā ma lona atalii, i totolu o le patapatatū mai o le solo ifo o le malumalu. O le toalua lenei sa la'ua pepese leotele ma fai viiga o le Atua o le aukerisiano. Na tula'i le perenisi faatasi ma Parapate, ua tamomo'e i le falepuipui ma aioi ia Konelio ina ia alofa faasaoloto lona faletua ma le nofoaalo. Na latou o i le malumalu o faaleagaina, fai a latou tatalo, ma lavea'iina ai le faletua ma le atalii o Perenise Temetirusi.

O le i'uga o lenei faalavelave, na liliuina ai i latou i le talaiga a Konelio, ma papatisoina ai le perenise ma lona aiga, o Parapate foi ma lona aiga uma faatasi ma latou uo, i le suafa o Iesu Keriso. Ina ua faalogo Sagato Peteru (le uluai ta'ita'i o le Uluai Ekalesia), i le vavega na faia i Sikepusisi, ona tofia lea o Konelio e avea ma ulua'i epikopo o le aai, ma latou galulue faatasi ai ina ia faaliliuina le aai atoa ia faatuatua ma faaolaina ia Keriso Iesu. O se tasi o sooo mai Sikepusisi e igoa ia Eunomiosa, na tofia e fai ma faifeau o le Uluai Ekalesia. Na malii Konelio ina ua afu lona soifua ma sa tanumia i tafatafa o le malumalu faapaupau o Seu lea na soloia i lalo e ala i le mafui'e. O lona aso faamanatu o le aso 2 Fepuari; o ia o le Sagato Faatamā o fitafita ma vaega'au, faapea i latou o Iutaia ua liliu mai i le faakerisiano.

A o le igoa Konelio o lona uiga o le '**pu**' po o le '**foafoa**'. Na laugaina i le Aso Sa mulimuli o le masina nei, lona ola mata'u ma faamaoni i le Atua. O se foafoa toe fafagu mai i taitai'au o le atunu, le faigamalo ma le Ekalesia, ina ia pule ma ta'ita'i e pei o Konelio - e faalogo, e usitai, talia ma ola ai, i le Tala Lelei, a e liliu ese mai ala pi'opi'o, ala faapaupau e fano ai. Ia faia foi o tatou aiga ma nuu, o ni Kaisareia e tutupu mai ai ni Konelio, a o ni Iopa ma Sikepusisi e tula'i mai ai ni Peteru, latou te fa'aauau le galuega a le EFKS, i ni isi auga tupulaga mulimuli mai. Ao se toe fafagu i le ola pumoomoo ma le manatu faapito sa i ai Peteru, ina ia tatala faalautele mo tagata uma, o e na malii ai Keriso i le satauro. **F. Tolua**

OLA FAATASI MA TAGATA ROMA

O le Manatu Aoao lea o faitauga Tusi Paia mo le 2 vайасо mulimuli o le masina nei, ma le vайасо muamua o Mati. O le ulua'i feau o iloa ai le finagalo paia o le Atua mo lana fanau uma i le lalolagi - ia ola ma nonofo faatasi - le Iutaia, Roma, Eleni ma isi. E leai se tasi e tu faamauga. Faatoa oo mai Roma i luga o le tulaga o le tala faasolopito o le lalolagi i taimi o le Feagaiga Fou; na fanau mai Iesu i Peteleema, ona o le poloaiga a Kaisara Aokuso. A o taimi o le Feagaiga Tuai, o malo Aikupito, Asuria, ma Papelonnia o nisi ia malo malolosi na ola faatasi ma le nuu o le Atua, o malo sa pule i le lalolagi.

O nei malo malolosi, sa fa'aaoga e le Atua fai ma ana auauna, e faailoa ai lona paoa silisili ese, lona alofa ma lana amiontu, i le va ma isi atua. Na fai malo faapaupau ma ana auupega e a'oa'i ma faatonu ai lona nuu, e pei ona sa i ai i le Tafeaga. O taimi ia na folafola ai le afio mai o le Mesia o Iutaia, ma lana faigamalo, na te pulea le lalolagi atoa, seja oo i le faavavau. Lea ua taunuua ina ua fai le poloaiga a Kaisara Aokuso o Roma, fai le tusiga igoa, na i'u ina fanau mai ai Iesu i le aai a Tavita, o lona faasinomaga tonu.

“O aso lava ia na oo mai ai le poloaiga..” O le fuitau lenei e faasino tonu i le taimi ma le poloaiga na fai e Roma, i le tausaga 2TLM. Peitai, e faasino foi lenei upu i le amataga o mea uma - ***i aso lava ia*** na faato'a faia ai le tagata, aemaise le aso na faato'a faia ai le uluai soligatulafono a Atamu ma Eva, ma agasala ai le lalolagi atoa. O aso ia na oo mai ai ***le poloaiga***, o le a fanau mai le tama, na te tu'imomomo le ulu o le gata, o le tiapolo lava lea. O le Feagaiga Tuai atoa, o le faagasologa lea o lenei fuafuaga mamana a le Atua ma lana poloaiga, e oo i ona aso e tatau ai, ona tino mai lea. Lea ua tino mai ina ua tula'i mai Roma.

O le muagagana lauiloa i le mamalu ma le pule, le tamaoaiga maoa'e o atina'e i vaega eseese, le malosi faafitafita na ausia e Roma, ‘*E lei fausia Roma i se aso.*’ Peitai e ui i lena maoa'e sa i ai, a ua leai nei; e pei lava o isi malo tetele sa muamua atu, ma mulimuli mai, e mavae uma lava. A e na o le tasi le Malo e faavavau, e leai sona gataaga, na o le malo o Keriso, o le malo o le Lagi, a ua vaaia i le lalolagi e ala i lona satauro ma lana Ekalesia paia.

F. Tolua

TA’U ATULE AMIOTONU A LE ATUA

“17 Le atalii e o le tagata, ua ou faia oe ma tagata vaai i le aiga o Isaraelu; o le mea lea ia e faalogo mai ai i le upu a lo'u gutu, ma e apoapoa'i atu ia te i latou mai ia te a'u.” Ese.3.

O le mataupu lenei a le ***Au Leoleo*** o le vayasosa lona lua o le masina, faavae i le Esekielu 3: 15 - 21. O le uma ai lea o aso e fitu talu ona nonofo le perofeta, ma le nuu o i le tafeaga i Teleapipa; sa fememea'i o ia i lea fitu aso. E le gata ina fememea'i ona o tiga o le tafeaga, a e sa fememea'i foi i lona molimau, i le mata'utia o amioga a tagata. Ona fetalai lea o le Atua i le perofeta, i lana galuega faatagata vaai - o le galuega e faamasinoina ai o ia, e faamasinoina ai foi ma le nuu. Pe afai e agasala le tagata, o lona i'uga lava o le oti. Peitai o le tiute o le tagata vaai, e apoapoa'i atu, ina ia liliu ese le tagata agasala mai lana amio leaga. Afai e salamo lea tagata, e faaolaina o ia; e faaolaina foi le perofeta, ina ua fai lona tiute. Peita'i pe afai e le salamo le tagata agasala, e oti lava o ia, a e faasaoina le perofeta, ua fai lana galuega. O le amiontu lena a le Atua - e sa'o ma paleni lelei, o le tagata ma lona taui.

E le gata la ina galue Esekielu i tagata agasala ia salamo, a e faapea foi ona ia faamalosi'au i tagata amiontu, tagata amio lelei ina ia tumau pea i ai, ia 'aua le solomuli pe faavaivai, a ia faamalolosi pea e fai le finagalo o le Atua. Pe afai e le faia le tiute o le perofeta, ma i'u ina liliu ese ai le tagata amiontu a e fai le agasala, ona oti lea o lena tagata, a o lona toto e taui atu i luga o le perofeta, ina ua faatamala ma faavaivai i le faatinoina o ona tiute. A e afai e lelei pea ma tumau le amiontu, amio lelei o tagata, ona laveaiina lea o i latou, e ola foi le auauna a le Atua, e tau fai manuia itu uma e lua - o le perofeta faapea foi le nuu.

Ua pei lava Samoa o nonofo i Teleapipa, i le fememea'i faatafeaga, pe a vaai ma faalogo atu i taualumaga o faigamalo, faiganuu, e oo i le lotu. Pe mata e le o se faailoga lea o le vaivai o le ola tatalo? Aemaise, o se faailoga o le le faia o le galuega faatagata vaai, ua vaivai le leo faaperofeta, le tauologologo atu a le Ekalesia? E fai le faamasinoga amiontu a le Atua, mo le aufaigaluega faapea ma le faapotopotoga, e fua i le faataunuina pe leai, o le amio e ola ai, ma le tiute ua valaaunina ai. **F.Tolua**

O LE PEROFETA MULIMULI

(O le Tala Faafagogo ua FaaSamoaina mai le Tusi, "The Last Oracle", tusia e James Rollins)

O le Peresetene o le Iunaite Setete o Amerika.

Na taofi e Karai le mea lea i lana faatatau. E mautinoa ua uma ona faatapoleni e Leoleo Nanā le nofoaga lenei, ua salu faafafia, faatutū ai lapataiga ma tapu. E faaopoopo i lena, ua uma ona faatulaga e Leoleo Nanā a latou leoleo i soo se itu o le tulaga mo lauga, o loo mataalia mo mea e lamatia ai le soifua o le Peresetene.

Na iloilo e Karai le tele ma le aofai o taavale o loo paka, o se sami o enetena satelite. O le nofoaga atoa o le sauniga ua pa atoa ma si'osi'o e pa uaea ma fitafita sikulaki, o isi e savavalii o isi i totonusi o sipi. E ui ina aogā teuga faafoliga a Karai i se vaai mamao, a e na ia masalomia le sao atu ai i totonusi o le nofoaga. E leai sana pine faamaonia, leai se pasi e faataga ai i totonusi.

A o ia tau iloilo ma fetuunai ana gaioiga, ma saosaoa atu agai i le nofoaga laulauā, na segia lona mauli i le telē o le poloketi. O le fale faaofuofu uamea sa solosolo malie atu i se auala tu lua, o loo toso e ni siaki tetele pei o ni tafolā. Ua oo atu i le afi masini ua mate ma ua amata ona faapulou ifo i ai, ua matala atu i luga i le lagi, o ona uamea ua toeitiiti faatauaso i le susulu o le la, o lona umī i luga e pei ai le Faatagata o le Saolotoga e tu i ona lava tauau, a e lē pa'i atu i le taualuga o le fale ofuofu.

E oo ia Kouasaki na mapumapu lona ofo i le telē o lenei fausaga o loo taavale. Na ia faalagolago atu ma valaau atu, "O le a le gaioiga e fai pe a tatou – ?" Na sii atu e Karai lona lima e faafilemu o ia. E i ai le isi leo fou na ia faasalavei le saunoaga a le Peresetene. E pei o le peresetene, e faapena foi ona masani Karai i le leo o le tagata lea e tautala. Na tautala faa Rusia, ona toe faalua lea i le faaIgilisi, ina ia silafia uma e le au valaaulia.

O le leo o Senatoa Nikolao Solokova na leoleoā agai atu ia Karai. "Ou te matuā tete malosi i lenei taufaaleaga!" Na ia avaavau atu ai i le faaleoteleleo. "Lenei ua tatou potopoto, ua faamālō le tasi i le isi, mo le soloiesea o se vaega inosia o le tala faasolopito o Rusia – mo le nanāina, e pei o se mea e le'i tupu, ua salu i lalo o le fala u'amea. A e faapefia i latou na fasiotia, ina ua pa le pomu, faapefia i latou e faiatou afe ma afe ua faafanoina e maliliu i le kanesa ma le lukimia, a e a le afe ma afe o tamaiti o le a fananau mai e lē atoatoa o latou tino, le tiga ma le masiasi o le leaga o mafaufau? O ai o le a tautala mo i latou?"

Ua latalata atu nei Karai, e mafai ai ona ia iloa atu le nofoaga faapulelaa o siitia i luma mai o le vaega e nonofo uma ai le au valaaulia. Sa lē mafai ona iloa tonu fuatino ma foliga o tagata ona o le laiti, peitai sa i ai ni masini televise lapopo'a sa faaitualalua i autafa o le tulaga faamaualuga mo lauga. O le tasi televise sa fa'aalia ai le ata o le Peresetene Rusia, a o le isi o le ata o le Peresetene o Amerika. Sa tofu i la'ua ma le pulelaa, sa tutū ai i tua. A o le ogatotonu o lo la'ua va, sa tu ai se isi tagata a o feagai ai ma le vevesi solo o tagata. O Nikolao Solokova. O nisi fitafita sa taumafai e aveese le senatoa mai luga o le tulaga, a o nisi foi fitafita sa taumafai e puipui o ia ina ia mafai ona tautala atu. A o pisi solo tagata ma vevesi, sa faasaosao atu ai Nikolao i luga o le tulaga e amata lana mataupu, o le tetee e auala atu i luga o faasalalauga.

I le isi itu o le tulaga, na faataamilo ai ma puipua e tamaloloa laei uli le peresetene.

O le a lava le mea o fuafua e Nikolao, o lenei ua amata. Na punou atu i luma Karai ma faaola le afi o lana pasika. Na oso saosaoa atu i luma e pei se roketi aga'i i le tulaga.

Na fe'i solo sipika ona o le eletise, ona toe fa'aauau ai lea o Nikolao, i lona 'e'ē leotele atu, "Ua outou talitonu uma o se pusaoti matagofie faapenei na te faailogaina le mutaaga o se pulega ua pi'opā, peitai ua na o se mea pepelo! Ua sola ese le sau'ai mai lona pa! Tusa po o le a le lapo'a o se loka, ma le malolosi o uamea, e le mafai ona outou toe lokaina le sau'ai i tua o pa. Na pau lava le i'uga moni i lenei puleaga, o le suia atoa o tatou uiga ma amioga, ia fai tulafono e lelei ma aiaiga e sa'o ma moni. O lenei sauniga o loo faia, ua na o se mea faatauvaa e faafoliga ma ua sesega. Na o faafoliga, leai se moni! Ua tatau ona tatou masiasi uma!

Mulimuli ane ona mafai lea e leoleo ona tete'e atu i fitafita ma lagolago a le senatoa. Na se'i ese le faaleoteleleo mai lima o Nikolao. Na tulei ma toso ese o ia mai luga o le tulaga.

O le peresetene Rusia na amata ona saunoa atu i lana gagana, e faaleo lona toatama'i ma lona faatoese ona o le mea ua tula'i mai. O le peresetene Amerika na geno atu i ana leoleo nanā e solomuli ese latou, sa le'i mana'o e aafia tele o ia i faiga faapolokiki ua aliali mai. Na amata ona toe fa'aauau saunoaga o le aso.

O latou tua atu, na fa'aauau ai le sosolo lemu atu o le fale faapuloulou tele na te folo ufitia atoa le afi. Na faalemu e Karai lana pasika. O loo i ai le filifiliga na te faia: ina ia aga'i atu i le tulaga po o le afi. Na ia manatunatu i le saunoaga tete'e a Nikolao, ma lona aveeseina mai luga o le tulaga. O se mea sa fuafua lelei. Na tapena lelei e le senatoa se auala ina ia aveeseina ai o ia, ia 'aua ne'i auai i le sauniga o loo fai, a ia ave ese. A o fea e ave i ai? Sa le'i tuua e Karai le fesili lena e alu loa. Na te le'i mana'o e tuu o ia i se mailei e lamatia ai. O leoleo ia na latou aveesea Nikolao mai le tulaga, masalo o tagata o lana vaega, o loo latou ave o ia i se nofoaga e saogalemu ai. O tua atu o le faaputuga o taavale a le au fai televise, na iloa atu ai e Karai se sipi lanu meamata a le vaega'au o loo masau ese mai le vaega o le au faasalalau. Na ui atu i se auala pefu e laina tutusa ma le auala e valu futu le maualuga o le faapuloulou maoa'e. O le auala matautia e ui ese mai le afi ona mimilo lea i le faaiuga o le auala agai i le itu i tua o le nofoaga.

Na iloa atu e Karai se tagata o laei i le suti sa i tua o le sipi.

O Nikolao.

Na autilo a'e i luga Karai. O le fausaga uamea faatauaso mata ua ia foloina e tusa o le afa o le tino uliuli laulauā o Sarakofagus. Ile isi sefululima minute, o le a tapuni atoa ai ma ufitia le oti. O le tulaga mo lauga o fai ai le sauniga e tusa o le kuata maila le va ma le afi.

E tatau ona fai se faaiuga a Karai.

Na ia vaaia Nikolao Solokova o nofo i tua o lana kesi i le faleoo o leoleo i le taimi o le suesuega.

Mai le vaaiga o ona laei ma lana toniga, e oo i le faiga o lana lauga, na iloa ai o le tamaloa e faamauluga ma faasausili ia te ia lava, e iloa gofie le mana'o e pule. Na suluia i fafo mai ia te ia.

E tatau ona manao Nikolao e fia vaai i le mea o le a tula'i mai.

O le a la le mea ua agai atu ai o ia i tua o le afi?

Se'i vaganā...

Na mimilo ese e Karai le pasika mai le auala uliuli ma tipi atu i le laolao o le fanua. Na ia aga'i sa'o i le faasi'usi'uga o le taigaala, fuafua e faasalavei le taavale pe a mimilo mai le pioga o le auala.

"Piesa!" na faataiō atu ai Koualasaki. "O fea ta te o iai?"

"Ta o e laveai le Peresetene."

"A o le tulaga la e le isi itu!" na faasino atu le lima o Karai i le itu faafeagai.

Sa le'i amanaia e Karai, a e faaoso atu le pasika e pei se uilapefu i le laolao. Na piimau Koualasaki i au o le pasika. Na atili ai ona faasaosaoa e Karai ma agai atu i le fanua lafulafuā. O vao ma palapala na felelei solo mai i ona tua.

O luma atu, na taututu'u atu ai le sipi i autafa o alapa'u taiala e fa salau iata. Ua toe itiiti taunuū le taavale i le iuga. O le a latalata lava. O Karai o loo tusa ma le malae lakapi lona mamao ese ma le auala.

Ma ua iloa mai i la'ua.

Na faasino mai se lima o se isi i le la'ua uila afi. O le vaai mamao mai, o Karai ma Koalasaki e foliga mai o ni fitafita Rusia o loo tafafao tietie pasika. O le a faaluafesasi ma faaletonu totonu o le sipi mo sina taimi.

Na o le pau lena o le avanoa latou te maua.

"Koualasaki!"

"O le a?"

"E mafai ona e aveesea se tasi o pa'u i le itu i tua o le latou taavale pe a mimilo i le pioga?"

"E te faavalevalea?" na ia fesili atu ai, a o salutululu lona leo i le alu a le pasika.

"Faatali la."

Na mimilo atu e Karai le pasika i se mea e mago le oneone.

O tafega na latou faamafola ma faalamolemole.

"Fana loa!" na ia faataiō atu ai ia Koualasaki.

Ua leva ona tuu i luga le fana a le tamaloa. Na faalagolago i le itu o le taavale ma tuu le fana i lona tau'au. Na lagona atu e Karai pei o loo ia feula atu lana fana. "Sau la'u pele, ia e faia se mea e mimita ai lou tamā."

O la'ua luma tonu atu, na taunuū atu ai le sipi i le faataus'i'usi'uga o le taiala. Na faalemū atu ina mimilo tu, peitai na faigata ona maua le pi'oga. Na taumafai le avetaavale e taofiofi le sipi i luga o le auala.

Na lagona atu e Karai le pa pa o le fana mai le taavale pipii i le pasika. O le fana AN-94 Rusia e ta'i lua pulu e alu sosoo i le amoti e tasi. O le taimi lava lea e tasi, na mafuli faafuase'i autafiti ai le sipi ina ua lē mafai e le avetaavale ona taofiofi, ina ua pasae ma asu le pa'u itu agavale i tua. Na sese'e atu le sipi ma taia i le pa simā sa i le va o le taunuuga o alapa'u.

Na mapumapu fiafia Koualasaki ma oloolo le itu o lana auupega. "Faafetai pepe!"

O nisi faamalo na motusia faafuasei a o tuua e le pasika le oneone a e toe folau atu i le itu gaoā. Na tatipi atu maa ma alā, a o saei atu i luma ma taunuū i le auala i nai sekone.

Na taatia pea le sipi i le mea na taia ma sese'e atu ai, o le tasi itu ua mā'omo'omo, ma ua maliu ai se tasi fitafita i le nofoa i luma. O le isi toatolu sa i totolu na feosofi i fafo ma solomuli atu i se faaputuga o faapulou ogā simā ma faleoo uamea maulalo sa faatumu ai le avanoa i le va o alapa'u.

A o taamilo atu Karai i le laulelei, na lagona atu le patipati mai o tagata i le tulaga faatasi ai ma le alalaga i le fiafia. Ua oo le sauniga i lona faatumutumuga. A o uftia i leo o le fiafia, na tau le lagona ai e Karai le leo o pulufana o tafana atu ai i la'ua. Na pasae le pa'u i luma o le pasika, a e na faatali mautinoa lava Karai i se osofaiga, ona ia faasaga lea o le uilaafi i le itu mamao atu o le sipi malepe. Na ia taofi tutu le uilaafi i tua o le sipi ma taavale ese mai le pasika.

Na faapena foi ona oso atu ma Kouasaki i ona autafa, ona la lalafi lea i tua o le taavale malepe. Na taia isi pulufana na tafana mai ai la'ua i luma o le sipi. Na autilo faavave atu Karai i le itu i tua o le sipi. Na ia vaaia se tagata fai suti o sola faanatinati atu i le ogatotonu o alapa'u, na siitia a'e i le valu futu le maualuga i itu uma e lua, na fausia i simā ma uamea. O Nikolao Solokova sa tamo'e i le saosaoa e tolu selau iata mo le tini – i le mataupu lenei, o le itu i tua o le ala faaofuofu o loo taavale. Na taumafai Karai e fana atu o ia, peitai na sau se pulufana taia i le taliomo o le sipi ma pasi atu i autafa o ona autaliga. Na ia iloa atu le fana o loo pusa mai le asu i ona gutu, o loo uu e se fafine lauulu lanu moana malosi. O Elena.

Na fetuu Karai ma toe solomuli i tua.

Na faataiō Kouasaki, ua lavea i le tau'au.

O le fafine ma se isi fitafita na la'ua taofiosia i la'ua i a la fana.

Na siaki e Karai lana uati.

Sefulu minute.

Na lagona atu e Nikolao le pa o fana i ona tua ona ia faamalosi lea e tamo'e televave atu i le avanoa i le va o alapa'u ua siitia, peitai na milosia lona tulivae agavale ina ua lavea le sipi. Na ia faamoemoe ia Elena e saogalemu ai o ia.

O ni tagata faigaluega e toalua na savavali atu i le itu i tua o le Lafitaga uamea. O le fausaga tele na sosolo lemu atu lava i luga o alauili, tolotolo atu i le mamao e tasi le futu i totolu o le minute i luga o polo taavalevale Tefalona, o loo toso e siaki tetele i ona itu e lua.

O se faitotoa tatala i luga, e pei o le telē o se faitotoa fale taavale na matala i luma atu ma sa avanoa e ulu atu ai i totolu o le Lafitaga o loo sosolo. O le

mafuaaga autu lea na sola mai ai Nikolao mai le toatele o isi. E le fia nofo o ia i lumafale o le faitotoa matala lena pe a faatino ma faataunu le Fuafuaga Uranusi.

Na ia setusetu faanatinati atu i lalo i le auala iliili ua tumu i le va o alapa'u. E tatau ona ia ui atu i le faitotoa lena, ma oo atu i totolu o le Lafitaga, ma ulufafo atu ai i lona itu i tua a e le'i tapunia.

E oo lava ia te ia na te lē mafai ona taofia Fuafuaga Uranusi.

Na pau le mea na te faia o le alu ese mai lona auala. O le fuafuaga na amata fafau mai le 1999, ina ua uluai amata le Fuafuaga mo le Fausia o le Lafitaga. O le faamoemoe o le FFL ina ia taofia ma uifi le Sarakofagusi tuai. E tele tausaga na fautuaina ai e inisinia ua lamatia le saogalemu, e toe itiiti ona malepe lea o le nofoaga, ma salalau ai le lua selau tone le mamafa o kasa niukilia i le ea. E oo mai lena taimi, ua i ai vaega o le Sarakofagusi tuai ua amata ona toulu ese. O nai pu laiti ma mavaevae ua amata ona fausia. O lea na fuafua ai le FFL ina ia taofimau le Sarakofagusi. O lona uiga e puluti ia pu, fausia pou puipui, ma faamautu faaleleia o vaega uma e talafeagai ai. E fai nei mea uma, a o fausia le faapuloulou tele o le Lafitaga, i le nofoaga saogalemu o le fa selau iata mamao ese.

O le galuega o le uluai fuafuaga na mae'a i le 1999 – peitai sa i ai ni ona faalilolilo. I le tuanai ai o le pa'ū o le Sovieta Iuni, na sosolo fa'aafi faiga pi'opi'o. E le'i taugata le tau na faapipi'i faalilolilo ai ni pomu laiti se fa i totolu o pou puipui fou. Na i ai pea lava e le'i ola mo se taimi umi seia oo mai ananafi. O anapo, na lafo ai e se tasi o fitafita a Nikolao se faailoiloi i le pomu sa tatao, ma faavasega ai le taimi e ola ai, ina ia fetau ma le tapunia o le Lafitaga i luga o le Sarakofagusi. A ola loa, e lē mafai ona toe tapeina, e leai se toe liliu i tua.

I le ta tonu o le lua minute o lumanai le faamaufailogaina o le Lafitaga, o le a pa pa ai loa pomu. E leai se tasi o le a ia lagonaina. Na pau le vaaiga o le a iloa o le malepe o le simā, sosoo ai ma le solofa atoa i lalo o le vaega o le puipui o Sarakofagusi – le itu o loo faafesagai tonu ma le tulaga o lauga. Mo le lua minute atoa, o le a faataele atoa ai le nofoaga ma tulaga o lauga, i se aofaiga tele o kasa faaniukilia, a e le'i tapunia ma faamau lelei le Lafitaga agai i puipui simā o i tua o le Sarakofagusi. O le faasalalau ai o kasa niukilia o le a leai sona afaina tele i le taimi tonu lea. O le upu moni, e leai se tasi o le a ia faalogoina se mea. Peitai i totolu o lea

lua minute, o i latou uma o loo i ai, o le a latou pisia i se inumaga ogaga e oti ai i kasa oona.

O le a latou maliliu uma i totolu o nai vaiaso.

I le sauniga o loo i ai le palemia ma le peresetene o Rusia, faatasi ma taitai o malo i le atu Amerika ma le Iuni Europa. Pe afai e manuia, o le misiona a Nikolao o le a tuu ai malo tetele uma o le lalolagi i le fememea'i ma le vevesi, pe afai e salalau le faaumatia i kasa oona faaniukilia i le lalolagi atoa, mai le gaioiga a lona tina o le Keliapinisiki 88, o le a manaomia e le lalolagi se leo malosi, se tasi sa lauiloa i lona tautala malosi ma lapatai mai i lenei puapuaga.

O le a latou faasaga ane i le tagata e toatasu na sao mai le Gaioiga Uranusi.

Ma i le faasolo mai o masina – i le limataitaiina e le vaega faalilolilo o savana – o le a faatino ma faailoa e Nikolao le atamai maoa'e, le tofa mamao ma le silasila loloto.

Mai le afi o le a mumū, e faaeaina a'e ai Nikolao i le paoa i totolu o Rusia, mai iiina, o le a faasolo atu ai lona lauiloa i le lalolagi atoa. O le a tula'i mai Rusia i totolu o kasa niukilia, na te taitai le lalolagi i se itulagi fou.

O mafaufauga ia o loo ia tafuina ona moomooga i le taimi nei.

Na ia setusetu atu agai i tamaloloa e toalua sa mulimuli i le itu i tua o le Lafitaga. Na ia se'i ane lana fana mai lana taga. E luna lava pulu. Toetoe a pipii i le ulu. Na toulu ifo le toalua e pei ni taga mamafa i le ilili. E le tatau ona i ai nisi e molimau.

Na faatopetope atu Nikolao i le avanoa o loo i le itu i tua o le fale faapuloulou. E tusa ma le taseni ni la'a e kolosi ai i le ala. O puipui uamea o le Lafitaga sa ta'i sefululua mita le mafafia.

E sopo loa Nikolao, ona taunu lea i le ogatotonu o le Lafitaga.

E ui ina sela ma faanatinati, a e na ia maofa i le telē maoa'e o le avanoa i le nofoaga. O le faafuofu uamea e a'e i le selau mita i luga a e luna ma le afa le faateleina o lona lautele. E lē lava le faamatalaina o le nofoaga faatusa i se ana. Sa pei o fetu i le lagu i le po, le fepulafi o le selau o molī na faamalamalama ai totolu, sa faatulaga solo i fatamanu uamea sa laina i totolu o le Lafitaga.

O luga a'e, na felavasa'i faakoluse ai se paso o taiala samasama. O masini tetele sua eleele faatonutonu sa tutu faatalitali, sauni mo le saeia i lalo o le Sarakofagus tuai. O faamaunu lapopo'a pei o ni taula o vaa, ma faamau auivi sa tautau mai masini kololi.

Na oo loa Nikolao i totolu o le Lafitaga, ona ia tu loa lea ma oomi le ki lapo'a lanu mūmū e tapuni ai le auauna faamau. Na motusia lemū ma tapunia i ona tua, tolotolo malie ifo lava i ona kia lapopo'a. E tusa ma la la'u uluai fuafuaga, o Nikolao ma Elena e tatau ona lalafi i fafo, i se potu faatonutonu o i le isi itu mamao o le Lafitaga. O le potu lena, o loo faatonutonu mai ai afi o uili, sa puipua malosi ma laina lelei i sila ina ia puipua ai le tagata e faatautaia le galuega, mai le aafia i kasa oona faaniukilia e salalau i le 'ea. Sa faatulagaina le potu i le itu tuufafeagai ma le mea e pa ai pomu, ina ia itiiti lava se aafia i kasa salalau.

Na mana'o Nikolao e oo atu i le potu lena, peitai afai o loo saisaitia pea Elena i le va o alapa'u i tua, e mana'o o ia ina ia laveai o ia mai le pa salalau o kasa pe afai e faataunu. E ui ina e lē o i ai tonu i le laina o le kasa salalau e pei o le nofoaga o i ai tulaga mo lauga, a e o le mea o loo i ai nei, e lamatia lava i kasa e ui mai le pu ma le avanoa o le faitotoa i tua – atonu e lē lava le malosi e fasiotia ai o ia, a e o le a lamatia ai lona mafai ona fanauina ni tamaiti.

O lea la, ina ia puipua saogalemu ona suli i tupulaga lumana, na sauni ai Nikolao e puipua le tamaitai. A e sili atu ai nai lo lena, na te lē mafai ona teena le mea moni, o loo alofa pea ma fia taus i le fafine. O le a faapea ane lona tina, o ona faalogona ia o ni vaivaiga, peitai e le mafai e Nikolao ona faafitia lagona o lona fatu.

A o tapuni lemu ifo i lalo le faitotoa, na agai atu loa i fafo Nikolao.

“Elena!” na valaau mai Karai mai tua o le sipi. “E tatau ona e fesoasoani mai ia i matou!”

Sa leai se tali. Mai ia Elena lena.

“Piesa, ou te lē manatu o le a mafai ona e faatalanoa ia sao mai iinei,” na fai atu ai Kouasaki. O lana paaga sa tolotolo teisi ese. O lona tau'au sa sisina mai ai le toto i lona peleue, a e na o sina ma'osia. “O se tagata ulu leaga. Aisea e popoto ai tagata ulu leaga e tafana, ma sa'o a latou fana?”

“Ou te lē manatu e leaga le ulu o le tamaitai,” na tomumu ai Karai.

Talosia e lē moni.

Na ia vaia le suiga o ona foliga ina ua fa'aalia mai o Sasa o le afafine na fanaua e Nikolao. O se paluga fefiloi o le te'i, faanoanoa ma le fia puipui. E i ai lava se sootaga i le va o Elena ma le teine, o se mea e sili atu nai lo se fesootaiga faauso a tamaitai faaopoopo.

(fa'aauau i le Sulu Samoa Mati 2025)

O LAU AFIOGA O LE SULU I O'U VAE

E UIGA I FAAIPOIPOGA!

“*O lenei, o e ua faatasia e le Atua, ‘aua nei faate’ a’eseina e se tagata.*” Mata.19.

Atonu e mafai ona faate’ ia oe i lenei mau - o le mafuaaga autu o le faaipoipoga, e lē ina ia maua ni fanau! O ulugalii e lē mafai ona fanaua ni tamaiti, e tutusa lelei ma isi ulugalii latou te mafaia - o ulugalii faaipoipo uma lava! Na fetalai Iesu, “*O le mea lea e tu’ua ai e le tane o lona tamā ma lona tinā, a e faatasi ma lana avā; ona avea ai lea o i la’ua o le tino e tasi.*” Pe a silasila le Atua i se matua ma lana tama, na te silafia ma faitaulia le *toa lua*. Pe a silasila o Ia i le tuagane ma le tuafafine, na te silafia ma faitauina le *toa lua*. Peitai pe a silasila o Ia i se ulugalii, na te silafia le *toa tasi*. O le *faatasia* o le tane ma le avā, o lona uiga ua faamauina ia pipii mausalī, ia tasi. O le faaipoipo ma ia avea ma tino e tasi, e lē o se mea e faia e ni tagata se toalua mo le tasi i le isi, a o le mea e faia e le Atua mo i la’ua.

O le faaipoipoga e lē o se mafutaga e fausia ma soo faatasi e tu ma aganuu, po o le tulafono, po o nisi lava mafuaaga, malosiaga, manaoga faaletagata; e oo lava i le *alofa* o loo taofi tagata e faavae ai mafutaga faaleulugalii. O le faaipoipoga o le mafutaga e tuufaatasia e le Atua. Ma o le tala fiafia, pe afai e tuufaatasia oulua e le Atua, na te mafaia foi ona taofi ai oulua ia faatasia pea, se’ia oo ina tatalaina i le ot. O nei ona po, ua o se mea fua le tete’ a o ulugalii, ua faataaloga i vai le faaipoipo nei, a e toe tete’ a taeao. O le mafuaaga taatele o le fai o tusi alei, o ‘feeseseaiga e lē mafai ona faaleleia’. E sa’o le tagata i lona lava manatu, ma e lē mafai ona alu ifo le tasi i lalo, e tau fai fe’ a’ei uma i luga. E mafua mai i le loto ua faama’ a’aina. A o le tulaga tonu lea na a’oa’ o mai ai Iesu. “*Ona o outou loto ina ma’ a’ a na tuu mai ai e Mose ia te outou e faate’ a ia outou avā; a e lei faapea talu mai i le amataga.*” O le a le ogaoga o le mafuaaga ma faafitauli e mafua ai feeseseaiga, e mafai e le Atua, i Lona mana ma Lona alofa, ona faatumauina la oulua faaipoipoga ma le nofo fealofani. Na te mafaia ona liliu oulua fatu ma oulua loto, mai le ma’ a’ a i le gaua’ i, mai le mauluga i le loto maulalo, mai le ita i le faamagalo,

mai le masalosalo vale i le alofa faamaoni; ma tatala ai le loto o le tasi ina ia toe faalelei ma talia ai le isi. E te faapea ane, ‘Ua ou fiu, ua uma auala eseese, ua siliga tali i seu, e leai se faamoemoe e toe fo’i i se lelei...’ Ia manatua, e leai se mea e faigata i le Atua; e ala ona foliga faigata, ona e lē o moni pe atoatoa ona tuu atu ia te Ia le mataupu. Pe afai ua i ai lou aiga i lea tulaga, faata’ita’i ona lafoa’i atoa ia te Ia. Na te mafai ona sui le loto o lau paaga, ma avatu ia te oulua se isi amataga fou mo se lumanai e sili ona fiafia ma manuia.

O LE LAGONA LĒ AGAVA’A

“²⁰*O le Atua o le lagi, o ia lava na te faamanuia mai ia te i matou; o le mea lea e tulai ai i matou o ana auauna, ma faia le galuega.*” Neemia 2.

Ina ua soloia i lalo pa o Ierusalem, ona taatia ai lea o le aai aunoa se malosi e tulia pe tetee atu ai i ona fili ma latou osofaiga. O le ala lea na faapotopoto ai e Neemia se vaega’au ina ia toe fausia pa o le aai. E leai sona agavaa, se a’oa’oina lelei po o se poto masani i lenei galuega. E lē o se matuaofaiva, e lē o se tusiata, se kamuta pe inisinia. E mamao ese Ierusalem, e le’i oo muamua foi o ia i le nofoaga ma le aai. O le a lava le ituaiga vaai tatou te faamatala ai Neemia, a e leai ma sona agavaa mo le galuega faafau pa, i le vaai faale tagata. A e o le tulaga masani lava lea i galuega a le Atua, ma tagata e filifilia e le Atua e faataunuina ana galuega - o tagata e lagona le lē agavaa.

O Noa le fai faatoaga na valaauiina e fausia se vaa i totonu o le toafa. O Tavita ua na o se leoleo mamoe na tofia ma ofo atu e faatoilalo le toa o vaega’au faafitafita. O Neemia ua na o se tautu uaina i totonu o le maota o le tupu, na valaauiina na te fausia le pa o siomia ai le malumalu ma le aai o Ierusalem. Pe a tatou talanoa i le valaauiina e fai le finagalo o le Atua, e sili atu ona tāua i te la le loto naunauta’i faapaiaina, nai lo nisi lava agavaa masani, e pei o le poto ma le a’oa’oina lelei, le poto masani ma tusi pasi maululuga. O le upu moni, o faiga a le Atua na te fa’aaoga ai i tatou i le tulaga ua aupito maulalo lo tatou manatu ifo i le lē agavaa ma lē talafeagai.

O se tasi o mafuaaga o loo i tua atu o lena faiga a le Atua, ina ia iloa e le tagata ua valaaauina, e le faamoemoe tele le galuega i sona agavaa na ia tapena i ai, a e faamoemoe tasi i le alofa ma le mana o le Atua e mafaia mea uma. O le isi foi mafuaaga, ina ia ave uma le faamalo ma le faafetai, le viiga ma le faamanū i le Atua, pe a uma ona fai se galuega; ia iloa e le tagata, o le Atua na mafaia ai, a e lē o ia.

Peitai ia malamalama lelei foi i le itu lenei: pe afai e tuuina atu e le Atua se ‘avega’, se ‘loto naunauta’ i po o se ‘vaaiga mamao’ i se mea o finagalo ai o Ia, ona e iloa lea e i ai lau filifili e tatau ona fai. O Neemia sa lelei ma mautū lana galuega na auauna ai, i totonu o le maota o le tupu; e saogalemu ma malu puipuia, e tele faamanuiaga mo ia ma le aiga, ua faamoemoeina ma faatuatuaaina e le tupu. E toatele tagata sa naunau e fia maua lea avanoa na galue ai Neemia, e lē toe fia alu ese ai. Peitai, pe ana fai e filifili Neemia e nofo mau ai i totonu o le maota o le tupu, ma lana galuega faatautu uaina, o lona uiga na te misia le faia o le finagalo o le Atua; na te melea le avanoa fa’aauro e fai ai le galuega, na o ia ua musumusu i ai le Atua e fia fai.

Semanū e leai se tusi o le Tusi Paia e faaigoa ia te ia. A o ai na iloa pe ana teena e Neemia le avanoa, e i ai auala e faate’ a ese ai ma lana tautu uaina, ma se taunuuga faanoanoa o lona olaga? A e faafetai, e ui ina sa faatauvaa ma lē agavaa i le iloa, a e sa agavaa le loto naunauta’ i e fia fai le mea o finagalo ai lona Atua. Pe afai e valaaufina oe e le Atua i se mea o finagalo ai, na te fa’aauppegaina oe, na te faatumuina, na te ta’ita’ i ma faatonu, na te avatu le tofa ma le utaga, le poto ma le atamai; e silisili ona Ia faamautinoa ia te oe, le i’uga manuia o le feau ua tuuina atu.

KIRITA, SAREFATA & KARAMELU

“¹⁹O lenei, ina feau atu ia, ma faapotopoto mai ia te au i le mauga o Karamelu o Israaelu uma.” 1 Tupu 20.

O se itulau aupito maualuga o le galuega a Elia mata o lea sa faia i luga o le mauga o Karamelu. O iina lea sa faia ai le sailiga o le Atua moni, i le va o le perofeta o Elia ma perofeta a Paala. Na valaaufina Elia i lona Atua ona pa’ū ifo lea o le afi mai le lagi, ma faamuina ai lana taulaga; na fasiotia perofeta a le atua faapaupau, ma toe faaliliu loto ma agaga o Israaelu e matata’u ma tapua’i i le ALII le Atua. O le

manumalo o Elia, na fai i luga o ‘Karamelu’. O le uiga o le igoa/upu Karamelu o le ‘eleele fua tele’. Peitai, a e le’ i oo Elia i luga o Karamelu, e ao ona ui atu o ia i nisi nofoaga se lua, o nofoaga e saunia ai o ia mo Karamelu:

Muamua, na ta’ita’ iina o ia e le Atua i le alia o Krita. O Krita o lona uiga, ‘ia osi le feagaiga’. O iina na iloa ai e Elia o le Atua o Israaelu, o le Atua osi feagaiga, ma o le Atua tausi feagaiga, na te tausia ma faatumauina lona nuu ma ana auauna i taimi uma, aemaisie i taimi faigata. O Krita na fafagaina ai Elia e oreva na latou aumaia areto ma aano o manu, ma inu ai le perofeta i vai o le alia, a o feagai le nuu ma le la mala. Mulimuli ane fai mai le Tusi Paia, “*Ua mavae nisi aso, ona mate ai lea o le alia, auā sa leai ni ua i le nuu.*” 1 Tupu 17. Na mate le alia sa inu ai Elia, na faasūsū ai lona galala. O lenei, pe afai e faamateina e le Atua le alia o loo e inu ma faatumauina ai lou laulelei, pe afai e faamago e le Atua le puna o le vai o loo e faamoemoe i ai, o lona uiga e finagalo o Ia ina ia toe ta’ita’ iina atu oe i le puna moni o lou malosi – o Ia lava lea. Na te fia aveese oe mai lena nofoaga muamua, nofoaga tuai, a e tuu atu oe i se isi nofoaga ese, nofoaga fou, mo isi faatonuga o lou valaaufina.

O lona lua o nofoaga na ave i ai Elia, o le nuu o Sarefata, o le aai i Saitonu. O iina i Sarefata na tausia ai o ia e le fafine ua oti lana tane. Na ia fai ai vavega i le toe luutaga o falaoa i le kate, ma sina suauu ititi i le fagu, ina ua lē uma ia taumafa. Na toe faia foi le isi vavega, na toe faaolaina ai le tama sa ma’i ma oti ai, a le fafine Sarefata. O le uiga o le igoa ma le upu ‘Sarefata’ – ‘o le faaleleia, faaliusuavai i totonu o se ulo’. O le auro i lona faato’ a maua mai, e lē mamā. E tatau ona faamamā ese otaota o fefiloai ai, e ala lea i le susunuina ma faaliu suavai i totonu o le ulo. O le vevela o le afi e tuuiseese ai nisi ‘otaota’, a e taatia mai ai, ma iila mai ai na o le auro moni. E faapena le auala e saunia ma tapena ai e le Atua ana tagata faigaluega; na te fa’aaoga puapuaga ma sauaga o afi vevela o tofotofoga, ina ia aveese ai otaota mai totonu o le ola faaleagaga.

E silafia lelei e le Atua laasaga uma lua te fetaia’ i luga o Karamelu. O le ala lea na te tuuina muamua atu ai oe i isi nofoaga o faamanuiaga tuufaasolo, o ‘Krita’ ma ‘Sarefata’, ina ia e lava tapena faaleagaga. Na te silafia ou malosiaga ma ou vaivaiga, o lea ia e onosa’ i ma faatuatua ia te Ia, faatalitali i le aso e oo mai ‘Karamelu’, ua saunia atoatoa lelei oe.

F. Tolua

ESEESEGA O APERAAMO MA PETERU

“³⁰Ua vaai o ia i le matagi ua tetele, ona fefe ai lea; ona afua ai lea ona goto.” Mata 14.

O le uma ai o le vasega i lefafagaina o tagata e silia ma le lima afe i areto e lima ma i'a e lua, na tuu atu ai e Iesu ona soo e muamua atu i le isi itu vai. O le folaua lea na afatia ai le sa o le au soo, i le matagi na agi mai luma. A o felafoa'iina le vaa, na latou vaaia le tagata o savali atu ia i latou, o savali i luga o le sami, ona atuatuvala lea ma feei, “*O le aitu*”. Na fetalai atu Iesu, “²⁷*Ia outou loto tetele; o a'u lava, 'aua tou te matata'u.*” Na fai atu Peteru ia Iesu, afai o ia, ia fetalai atu ia te ia e alu atu i luga o le sami. Ona fetalai atu lea o Iesu e alu atu.

Ina ua alu ifo Peteru mai le vaa, ma savali i luga o le sami aga'i ia Iesu, na ia faia ai se mea mata'utia ma le ofoofogia mo le ulua'i taimi – o le savali i luga o le vai.

Peita'i e le'i umi a e toe magoto ifo i lalo, ona ua fefe i le matagi. Pe ana tumau lona faatuatua ia Iesu, semanū e tumau foi o ia i luga o le vai, e tumau lona manumalo ma lona faamanuiaina, peita'i ua toilalo ma goto ifo. “³⁰Ua vaai o ia i le matagi ua tetele, ona fefe ai lea; ona afua ai lea ona goto, ua alaga mai, “*Alii e, faaola mai!*” ³¹*Ona aapa atu loa lea e Iesu o lona aao, ua tago ia te ia, ua faapea atu ia te ia,* “*O oe na, lē faatuatua itiiti, se a le mea ua e masalosalo vale ai?*” O le faafitauli o Peteru, ua mua ona vaai ona mata i le matagi o agi i ona autafa, ua aveese ai lana vaai ia Iesu. Ua sili lona fefe i mea o siosiomia ai o ia, nai lo lona faatuatua ia Iesu na te mafaia ona faaola, e vavao le pepesi, taofi le sou ma faafilemu le agi mai o afā, o lona siosiomaga.

O Aperaamo foi na si'osi'omia i matagi malolosi ma le loulouā o taualumaga o le soifuaga, ina o ia tausi se atalii a ua lata i le selau tausaga o lona ola. Na folafola mai e le Atua, o le a la foai mai se atalii mo ia; na taunu lava ina ua fanau mai e Sara ia Isaako. Na fiafia le loto o Aperaamo, a o ia vaai atu i le tuputupu a'e o lona atalii e toatasi. Peita'i, na faateia o ia i le fetalai mai o le Atua, ina ia ave lona atalii e toatasi, e osi ai le taulaga, o le taulaga mo Ia le ALII le Atua. Na siosiomia Aperaamo i se matagi e sili atu ona malosi ma mata'utia, nai lo lea na agi ia Peteru. O fea le folafolaga na fai mai i le atalii, e tupuga mai ai le aiga e toatele, a o lea o le a osi ai le

taulaga? Peitai fai mai le Tusi Paia, “²⁰*Ele'i masalo vale o ia (Aperaamo)ma le lē faatuatua i le mea na folafolaina e le Atua, a ua malosi tele o ia i le faatuatua, ua vivii atu i le Atua.*” Roma 5. Na malamalamalama lelei Aperaamo i o'oo'oga ma aafiaga o tulaga uma ua si'omia ai o ia. Peita'i, sa le'i pei o ia o Peteru; sa le'i tepa taula'i ma faamamafa i ai lana vaai; sa sili ai lava le malosi o lana pupula ma lona taula'i i le ALII le Atua. Sa talitonu o ia, e faamaoni le Atua, e tausi i ana folafolaga na fai, na te faataunuina lava, i lona taimi ma ana auala. O lona faatuatua lea na uuna'iina o ia i luma i lona manumalo ma le faamanuiaina.

Ma, e a'oa'o mai foi mo i tatou, le faataitaiga lelei a Aperaamo, tainane se vaivaiga ma le sesē o Peteru i luga o le vai. E i ai aso e si'osi'omia ai i tatou i faafitauli ma lu'itau ogaoga o le soifuaga nei, e tofotofoina ai lo tatou faatuatua pe se a le malosi o i ai. E pei o puapuaga faalotoifale i feagaiga osi faalefaaipoipoga e gausia ma malepelepe ai aiga, o mafutaga motusia i le oti ma e pele sa faamoemoe i ai, o aitalafu faaputuputu ua lē mafai ona totogi, o le tuli ese pe faamalolo faamalosia mai le galuega, o se gasegase lē matogafitia, ua faitau aso o totoe o le ola, e tusa ma le tala a fomai.

E faapea foi le tele o toatuga mai fafo atu, e lē oo atu i ai sa tatou feau, a e aafia tele ai o tatou olaga. E pei o taaviliga o matagi malolosi ona o suiga o le tau, o taua i le va o malo tetele ma le aafiaga o le tau o le soifuaga, o le pepesi o ituaiga faama'i eseese, ma le tele o suiga mai fafo ua aafia tele ai tupulaga o nei aso. E pei foi o gasegase faaupufai o malo, ma ta'ita'iga lē mautonu a o pulega faasolitulafono a ta'ita'i o le atunuu. O taupulega soona fai a nisi e mautofī i le malo ma Ekalesia, e mailei ma faatosina ai le lagolago atu, e ta'uta'ua ai o latou igoa ma ia fa'aauau ai pea i tulaga tofi, a e pologa ai le lautele o tagata pei o tatou i le faatinoga o nei manaoga.

E mafai ona tutupu mai nei mea, a o faasaga tepa taulai pea lau vaai ia Iesu ma le mana o lona Agaga, i le faatuatua e lē maluelue, ona Ia faia lea o vasega tetele ma foa'iina atu ai ia te oe faamanuiaga o manaomia. Na te fa'aavanoa ma tatala mai fai totoa e te ui ai, i totonu o pa pupuni, ma e savalia ai auala mautū ma folalelei, e lē toe māgoto ifo ai. Ina ua silasila pea ia te Ia le Faaola, a e le o faafitauli. **F.T.**

O TALA PUPU'U mo TAMAITI

FAITAU & TAULOTO LE TUSI PAIA

Sa i ai se tina kerisiano matua lava, na fiafia e faitau ma tauloto fuaiupu o le Tusi Paia mai lava ina o teine itiiti. A o tuputupu a'e lenei teine itiiti e avea ma teine talavou, faasolo ina matua seia oo lava ina loomatua, sa faatuputeleina lona fiafia e faitau, ma faaopoopo fuaiupu o le Tusi Paia e mafai ona ia taulotoina. A o lana tauloto e sili ona fiafia tele i ai, o le fuaiupu mai le Tusi o le 2 Peteru 1:12, “*auā ua ou iloa o Ia ua ou faatuatua i ai, ua ou mautinoa foi ua mafaia lava e Ia ona leoleo i le mea na Ia tuuina mai ai ia te a'u e oo atu i lea lava Aso.*”

Ua oo i ona tausaga mulimuli, ua matua lava o ia, ona amata lea ona galogalo mea i lona mafaufau, ua faasolo ina lē manatua le tele o mea. Ua oo foi i ana tauloto ma le tele o fuaiupu o le Tusi Paia, ua faasolo ina galo atu ma ua na tau lē manatua ina. Na i'u lava ina lē toe mafai ona ia tauloto atoa lana upu sii e fiafia i ai, se'i vaganā le vaega o i ai upu, “*mautinoa...le mea na Ia tuuina mai ai ia te a'u*”.

O lona taimi mulimuli lava, a o taoto i lona moega ua faasolo ina to lana mānava, o le a aveina a'e lona agaga e lona Matai, na maitauina ai e lona aiga ma ana uo, le memumemu o ona laugutu, a ua moeiini ona mata. Na faalatalata atu i latou e faalogologo pe se a le upu o tau fai mai, a o ia memumemu ma ta'uta'u le upu e tasi o manatua pea o lana tauloto, “*Ia, Ia, Ia (Him, Him, Him)*” Na o le pau lea o le upu, na manaomia e lenei tina – o Ia; ma na o le pau foi lea o le upu tatou te manaomia, auā ua na o Ia lava, tatou te maua ai le ola faavavau. “*Auā ua ou mautinoa, e lē mafaia e le oti, po o le ola, po o agelu, po o alii, po o e malolosi, po o mea i nei ona po, po o mea atalī, po o le maualuga, po o le loloto, po o se tasi mea na faia, e lē mafaia e ia mea, ona fata'easeina mai i tatou i le alofa o le Atua, o loo ia Keriso Iesu lo tatou Alii.*” Roma 8:38-39.

Outou le fanau, ua tele lava tusi ua outou faitau ai i nei aso, faapea auala eseese e faitau ai ituaiga tala eseese, aemaise i luga o telefoni ma aga fesooota'i. Ia outou faamasani e faitau le Tusi Paia ma tauloto nisi ona fuaiupu. Na o le pau lava lena o le Tusi e mautinoa lona sa'o ma lona moni. Ua na o Iesu Keriso, o loo autu i ai le Tusi Paia, o IA e mautinoa lona alofa ia te outou ma outou matua.

O LE TUSI PAIA A MELE

O Mele le igoa o le afafine o se ulugalii misionare i Initia; sa fanau ai i Initia seia oo ina atoa lona ona tausaga, ona ave lea o ia i Amerika e a'oga ai, a o tausi ma nonofa ma lona tinamatua (grandmother). Sa alofa lava le tinamatua ia Mele, ma sa fiafia e faitau i ai tala mai le Tusi Paia, ma isi tala e faafafia ai. A o faasolo ina iloa e Mele faitau ma tusitusi, ona ia amata lea ona fai ana tusi ma alofa i ona matua i Initia. Sa lafo mai foi tusi a ona matua; na amata ona faitau e le tinamatua ia Mele, a e na i'u ina faitau lava e Mele ina ua poto e faitau tusi. O se tasi aso ina ua latalata i le atoa o lona fitu tausaga, na maua mai ai foi le tusi a Mele mai lona tamā. A o totolu o le tusi, sa fafao mai ai ma se tupe, ma le faamatalaga e faapea, ‘*Mele, o lena ua alofa atu le tupe, e faatau ai sau Tusi Paia fou, o le ma'ua meaalofa lena mo lou aso fanau.*’

Na fiafia tele le teine o Mele ma faapea ane, ‘*O le mea tonu lava lea ou te mana'o i ai – o sa'u Tusi Paia fou.*’ Ina ua oo i le aso fanau o Mele, ona la'ua o lea ma lona tinamatua (grandmother) e faatau sana Tusi Paia. E tele ma eseese ituaiga Tusi Paia, o isi e lapopo'a, a o isi e laiti, e sausau auro isi, e faavaa malō foi isi; na faigata ona fai se filifiliga a Mele. Mulimuli ane ona ta'u lea e Mele le aofai o lana tupe sa i ai, i le faatau oloa, ma fesili i ai pe lava e faatau ai ni Tusi Paia se lua? Sa tali mai le faatau oloa, ‘*Joe, o lena e lava lau tipe e faatau ai ni Tusi Paia se lua, peitai e lē o le ituaiga lapo'a, pe sausau auro ma faavaa malō, a o le ituaiga masani. A e tutusa lava upu o i ai i totolu.*’

Na faalogo atu le tinamatua o ta'u Tusi Paia e lua, ona ia fesili lea ia Mele, ‘*O fea e ave i ai na Tusi Paia e lua? E lava le Tusi Paia e tasi.*’ Fai mai le tali a Mele, ‘*Ou te mana'o e tuu le tasi Tusi Paia ma a'u, a e ave le isi Tusi Paia mo se teine itiiti i Initia ma te tupulaga, e faitau ai ma na iloa ai tala ia Iesu, e pei o a'u ua ou fiafia i ai.*’ Ona faatau lea o Tusi Paia e lua. Na taunu loa i le tale, ona tusi lea e Mele lona igoa i le tasi Tusi Paia, a ua fesoasoani lona tinamatua e affifi le isi Tusi, e lafo faatasī ma lana tusi e ave i ona matua i Initia. Na ia tusi faafetai mo le meaalofa ua uma ona faatau lana Tusi Paia; na ia fai atu foi, ina ia la sailia se teine itiiti e fitu ona tausaga la te tupulaga, e ave i ai le Tusi Paia ua lafo atu.

Na fiafia tele Mele i lana Tusi Paia, e faitau pe a uma ona fai ana meaa'oga. O le upu sa ia fiafia i ai, 1 Ioane 4:19, “*O i tatou, ua tatou alolofa, auā na ia muai alofa mai ia te i tatou.*” Na tusi mai lona tamā, ua uma ona ave le Tusi Paia i se tasi o teine itiiti i Initia, e pei ona sa ia mana'o ai. O aso uma, e tatalo ai Mele mo lana uo e le'i vaai i ai, ua ave i ai le Tusi Paia. E mana'o Mele ina ia faitau lana uo, ma na iloa ai foi le alofa o Iesu, na maliu i le satauro e faamagalo ana agasala, ma ia na maua faamanuiaga uma o le alofa tunoa o le Alii o Iesu.

Na te'a tausaga e tele, ua i'u le a'oga a Mele i Amerika, ona toe foi lea o ia i Initia i ona matua, ma ia fesoasoani ai i le la'ua galuega faamisionare. E le'i umi ona i ai i Initia, a e la feiloa'i loa ma se tamaitai Initia la te tupulaga, o se kerisiano fiafia e alu i le lotu. Na fesili i ai Mele, ‘*Na faapefea ona e iloa le tala ia Iesu?*’ Ona tali atu lea o le teine talavou, ‘*Ina ua fitu o'u tausaga, sa ou maua ai la'u Tusi Paia fou, na aumai ia te a'u e se tasi ulugalii. Na ou faitau ai ma ou iloa ai, le alofa o Iesu ma lona maliu e faamagalo ai a'u agasala.*’

Na maua e Mele lana uo, sa ia lafo mai i ai le Tusi Paia, ma tatalo mo ia i tausaga e tele. Tamaiti, e i ai sau Tusi Paia? Na faapefea ona maua – o sou failogia i lou Sili i se vasega, pe o sau meaalofa o lou aso fanau? Ia, po o le a lava le auala na maua ai lau Tusi Paia, o le mea taua o lou fiafia e faitau ai, auā o loo faamatala mai ai tala i le alofa o le Atua, ma lona Alo o Iesu Keriso lo tatou Faaola. E te faitau atu, ma faalogo atu, o talanoa mai le Atua ia te oe! Pe afai foi ua e iloa le alofa o Iesu, ‘aua e te taofiofia na o oe, a e ia e faasoa atu i isi au uo, ma soo se tagata. E le gata foi o le faitau Tusi Paia, a ia e fiafia e tatalo mo au uo ma isi tagata. Ai foi se manaia, pe a mafai ona e faatauna se Tusi Paia ma foai mo se isi; po o se Tusi Paia o loo taatiatia lava i le tou fale e lē o fa'aagaina! *F. Tolua*

EFKS NUU FOU SISIFO, MALUA



Le faafanua o Nuu, o i ai le fanua (faailogaina), o faatuina ai le EFKS Nuu Fou Sisifo



Totonu o le fanua 1/2 eka i Nuu, o loo faatuina ai le Falelotu (faailoga i le X), o le EFKS Nuu Fou Sisifo (Ata Pu'eina Ofisa Misionare).

OSIGA FEAGAIGA EFKS TOAMUA, FALEATA



Fiso & Felicity, Faalefu & Bellarose, & Alo Pita FS

Matua, Aiga & UO o le Susuga Faafeagaiga & Faletua